

京州府學新移石經記

京州府學新移石經記
汲郡呂公龍圖領漕陝右之日持適承乏雍學一日謁公公喟然謂持曰京地闕閭間有唐國子監存焉其間石經乃開成中鐫刻唐史載文宗時太學勒石經而鄭鞏與周墀崇敕定九經文字上右及鞏以宰相兼祭酒於是進石壁九經一百六十卷即今之石經是已舊在務本坊自天祐中韓建築新城而六經石本委棄于野至宋梁時劉鄩守長安有幕吏尹玉羽者白鄩請輦入城鄩方備收軍之侵軼謂此非急務玉羽給之曰一旦虜兵臨城碎為矢石亦足以助賊為虐邠然之乃遷置于此即唐尚書省之西隅也地雜民居其處窪下霖潦衝注隨立輒仆埋沒腐壞歲久折缺殆非所以尊經而重道予欲徙置於府學之北墉子且伴圖來視厥既視圖則命徒役具器用平其溝塹而基之築其浮虛而實之凡石刻之偃者仆者悉輦置於其地洗剔塵土補銅殘缺分爲東西次比而陳列焉明皇注孝經及建學碑則立之於中央顏褚歐陽徐柳之書下迨偏傍字源之類則分布于庭之左右俄而如登道山如入東序河圖洛書大辟琬琰爛然盈目而應接或不暇矣先是有興平僧誕妄惑衆取索無厭大尹劉公希道沒入其費有欲請于朝廷乃以五百千畀之不費於公不後於民經始於元祐二年初秋盡孟冬而落成門序旁感雙亭中峙廊廡回環不崇不庳誠故都之壯觀翰墨之淵藪也學者暇日於此游息得之於目而會之以心固已有超然遠詣之意豈曰小補之哉竊惟六經天人之道備聖人所以遺天下來世之意盡在於是自周末至隋千餘載之間已遭五厄汗簡以載或焚或脫縑楮魚蠹易腐易裂道雖無窮而器則有弊唯鏡之金石庶可以久有唐之君相知物之終始而憂後世之慮深故石經之立殆以此也然以洛陽蔡邕石經四十六碑觀之其始立也觀視摹寫者車乘日千餘兩填塞街陌可謂盛矣及范蔚宗所見其存者纔十有六枚餘皆毀壞磨滅然後知不得其人以護持雖金石之固亦難必其可以久此 呂公所以為有功於聖人之經而不可不書也然持書此者豈特紀其歲月而已哉將使後之君子知古人之用心而不廢前功庶斯文之有寄云爾元祐五年歲次庚午九月壬戌朔二十日辛巳京州府學持謹記 河南安空之書